

四庫全書

集部

# 欽定四庫全書

集部

唐僧弘秀集卷三

一至

詳校官中書

臣張姚成

助教臣常循覆勘

總校官編修

臣王燕緒

校對官典簿

臣郭祚斌

膳錄監生

臣王肇濟

欽定四庫全書

集部八

唐僧弘秀集

總集類

提要

臣等謹案唐僧弘秀集十卷宋李龔編龔有  
梅花衲翦綃集已著錄此所選唐代釋子之  
詩自皎然以下凡五十二人詩五百首前有  
寶祐六年龔自序採摭頗富而亦時有不檢  
如釋寶月行路難一首載玉臺新詠第九卷

中本非僻書又鍾嶸詩品下卷以齋釋惠休  
道猷寶月共為一條且詳錄其事曰行路難  
是東陽柴廓所造寶月嘗憇其家會廓亡因  
竊而有之廓子賣手本出都欲訟此事乃密  
賂止之云云亦非僻書龔乃錄之第五卷中  
殊為舛誤至賈島始為浮屠名無本周朴始  
為浮屠名清塞後島遇韓愈勸返初服仕至  
長江薄朴為姚合所賞亦加冠巾黃巢之亂

抗節罵賊而死其在士大夫中亦卓然不愧  
于儒者龔乃錄其詩四十五首入此集亦為  
不類如云追錄其為僧之作則賈島一集何  
以又不採錄此亦自亂其例也豈誤以七卷  
所錄吟馬嵬漢上諸詩之別一無本為即島  
耶唐釋能詩者衆其最著者莫過皎然齊己  
貫休然皎然稍弱貫休稍羸要當以齊己為  
第一今觀龔所錄如集中聽琴劍客登南岳

祝融峯諸篇不見收則別裁去取亦未盡諸  
僧所長然唐僧有專集者不過數家其餘散  
見諸書漸就漸滅靡能裒合而存之俾殘章  
斷簡一一有傳于後其收拾散亡要亦不能  
謂之無功也乾隆四十五年十月恭校上

總纂官臣紀昀臣陸錫熊臣孫士毅

總校官臣陸費墀

唐僧弘秀集原序

古之吟詠情性一本於詩詩至唐為盛唐之詩僧亦盛  
唐一代為高道為內供奉名弘材秀者三百年間今得  
五十二人詩五百首或取於各僧本集或出於諸家纂  
錄皆有拔山之力搜海之功風製不塵一字弗贅發音  
雄富羣立崢嶸名曰唐僧弘秀集不敢藏於巾笥刊梓  
用傳識者第毫殘松管燈焰蘭膏截錦揚珠神愁鬼毒  
詩教湮微取以為緇流砥柱藝苑規衡非假沽名鼓吹

於江湖也兼禪餘風月客外山川千古之下一目可見  
耳皇宗寶祐第六春中和節日荷澤李龔和父序



欽定四庫全書

唐僧弘秀集卷一

皎然七十首

夏銅椀為龍吟歌

唐故太尉房公琯早歲曾隱終南山峻壁之下往往  
聞龍吟聲清而靜滌人邪想時有好事僧潛憂以三  
金寫之惟銅聲酷似他日房公偶至山寺聞林嶺間

宋 李龔 編

有此聲乃曰龍吟復遷于茲矣僧因之以告公公命  
憂之驚曰真龍吟也大歷十三載秦僧傳至桐江子  
使兒童憂金傲之亦不減秦聲也緇人或有譏者予  
曰此達僧之事可以嬉禪爾曹無以瑣行自拘因賦  
詩以見其意

逸僧憂枕為龍吟世上未曾聞此音一從太尉房公賞  
遂使秦人傳至今初憂徐徐聲漸顯樂章不管何人辨  
似出龍淵萬丈底乍怪聲來近而遠未必全由憂者工

眞生虛無非枕中寥亮掩清狄縈迴凌細風遙聞不斷

在煙杪萬籟無聲天境空

聽專一境則衆音不聞非萬籟之無聲也

昨向天

台宿華頂秋宵一吟更清迴能令聽者易常性憂人忘  
憂躁人靜今日鏗鏘江上聞蛟螭奔飛如得羣聲過陰  
嶺忽成雨響駐晴天將起雲坐來吟盡江空碧却尋向  
者聲無迹人生萬事將此同暮賤朝榮動還寂

周昉長史畫毘沙門天王歌

長史畫神獨感神高步區中無兩人雅而逸高且眞形

生虛無忽可親降魔大戟縮在手倚天長劍橫諸紳慈  
威示物雖凜栗在德無秋惟有春吾知真像本非色此  
中妙用君心得苟能下筆有神造誤點一點亦為道寫  
出霜縑可舒卷何人曾識此情遠秋齋清寂無外物盥手  
焚香聊自展憶昔邊兵圍未解感得此神天上下至今  
雲旗圖我形為君一顧煙塵清

買藥歌送楊山人

華陰少年何所希欲餌丹砂化骨飛江南藥少淮南有

暫別胥門出京口京口斜通江水流徘徊應上青山頭  
夜驚潮沒鷗鷺堰朝看日出芙蓉樓搖蕩春風亂帆影  
片雲無數是揚州揚州喧喧賣藥市浮俗無由識仙子  
河間姹女直千金紫陽夫人服不死吾于此道復何如  
昨朝新得蓬萊書

飲茶歌送鄭容

丹丘羽人輕玉食採茶飲之生羽翼

天台記云丹丘出大茗服之羽化

名藏仙府世空知骨化雲宮人不識雪山童子調金鐺

楚人茶經虛得名霜天半夜芳草折爛漫緗花啜又生  
賞君此茶祛我疾使人胸中蕩憂懷日上香爐情未畢亂  
踏虎溪雲高歌送君出

姑蘇行

古臺不見秋草衰却憶吳王全盛時千年月照秋草上  
吳王在時幾回望至今月出君不還世人空對姑蘇山  
山中精靈安可覩轍跡人踪麋鹿聚嬋娟西子傾國容  
化作寒陵一堆土

# 短歌行

古人若不死吾亦何所悲蕭蕭煙雨九原上白楊青松  
塋者誰貴賤同一塵死生同一指人生在世共如此何  
異浮雲與流水短歌行短歌無窮日已傾鄴宮梁苑徒  
有名春草秋風傷我情何為不學空門侶一悟空門無  
死生

效古

天寶十四年作

日出天地正煌煌闌晨曦六龍驅羣動古今無盡時夸

父亦何愚競走先自疲飲乾咸池水折盡長桑枝渴死  
化燭火嗟嗟徒爾為空留鄧林在摧折令人嗤

寓興

天下生白榆白榆直上連天根高枝不知幾萬丈世人  
仰望徒攀援誰能上天採其子種向人間笑桃李因問  
老仙求種法老仙咤我愚不答始知此道無所成還如  
瞽夫學長生

答蘇州韋使君

應物



詩教殆淪缺庸音互相傾忽觀風騷韻會我宿昔情蕩  
漾學海資鬱為詩人英格將寒松高氣與秋江清何必  
鄴中作可為千載程受辭分虎竹萬里臨江城一到掃  
煩政況今休黷兵應憐禪家子林下寂無營跡隳世上  
華心得道中精脫畧文字累免為外物撓書衣流埃積  
硯石駁蘚生恨未識君子空傳手中瓊安可誘我性始  
願懲素誠為無驚驚音繼公雲和笙吟之向禪叢反媿  
幽松聲

酬李司直縱諸公冬日遊妙喜寺題照昱二上人房寄長城潘丞述

達賢貴貞隱常懼迹不滅遂與永公期遺身坐林樾華軒何鱗鱗為我到幽絕心境寒草花空門青山月潘生獨不見清景屢盈缺林下長寂寥人間自離別何時解輕珮來稅丘中轍

山居示靈澈上人

清明路出山初暖行踏春蕪看茗歸乍削柳枝聊代札

時窺雲影學裁衣身閒始覺隱名是心了方知苦行非  
外物寂中誰似我松聲草色共無機

酬薛員外諠苦熱行

六月金數伏茲辰日在庚炎曦曝肌膚毒霧昏檐楹安  
得奮翅翮超遙出雲征不知天地心如何匠生成火德  
燒百卉瑤草不及榮省客當此時忽貽懷中瓊捧翫煩  
袂滌嘯歌美風生遲君佐元氣調使四序平中令霜不  
祆火餘氣常貞江南詩騷客休吟苦熱行

訪陸羽處士不遇

太湖東西路吳王古山前所思不可見歸鴻自翩翩何  
山賞春茗何處弄春泉莫是滄浪子悠悠一釣船

戲題贈吳憑

予讀古人書遂識古人面不是識古人邪正心自見貴  
義輕財求俗譽一錢與人便驕倨昨朝為火今為冰此  
道非君獨撫膺

奉應顏使君真卿與陸處士羽登妙喜寺三癸亭

秋意西山多列岑縈左次繕亭厯三癸

以癸丑歲癸卯朔癸亥日立故

名顏名陸創

疏址隣什寺元化隱靈蹤始君啓高致誅榛養

翹楚鞭草理芳蕙俯砌披水容逼天掃峰翠境新耳目  
換物遠風煙異倚石忘世情援雲得真意嘉林幸勿翦  
禪侶欣可庇衛法大臣過佐遊羣英萃龍池護清澈虎  
節到深邃徒想嶠頂期于今沒遺記

冬日天目西峰張鍊師所居

採新逢野泉漸見樓間所坎坎山上聲幽幽林中語仙

卿何代隱鄉服言亦楚開冰洗藥苗掃雪候山侶零葉  
聚敗籬幽花積寒渚冥冥孤鶴性天外思輕舉

出遊

少時不見山便覺無竒趣狂發從亂歌情來任閒步此  
心誰共證笑看風吹樹

題周諫別業

隱身苔上欲如何不著青袍愛綠蘿柳巷任疎容騎入  
水籬從破許船過昂藏獨鶴閒心遠寂歷秋花野意多

若訪禪齋遙可見竹窓書幌共煙波

奉酬李員外嘉祐蘇臺屏居春首有懷

昔歲為邦初未識今朝休沐始相親  
移家水巷貧依靜種柳風窓欲占春  
詩思先邀烏府客山情閒訪白樓人  
登臨許作煙霞伴高在方袍閒幅巾

送闕小師還金陵

如何有歸思愛別欲忘難  
白鷺沙洲晚青龍水寺寒  
蕉花鋪淨地桂子落空壇  
持此為心境應堪月夜看

酬襄陽詩僧少微

詩中答上人  
歸夢之意

證心何有夢示說夢歸頻文字齋秦本

法華文字  
多符秦本

詩騷

學楚人蘭開衣上色柳向手中春別後須相見浮雲是  
我身

早秋桐廬思歸示道諺上人

桐江秋信早憶在故山時靜夜風鳴磬無人竹掃堦猿  
來觸淨水鳥下啄寒梨可即關吾事歸心自有期

舟行懷閭士和



二月湖南春草遍橫山渡口花如霰相思一日在孤舟  
空見歸雲兩三片

寄題雲角寺梵僧無側房

時人傳是  
寶月後身

越山千萬雲門絕西僧貌古還名月清朝掃石行道歸  
林下眠禪看松雪

法華寺上方題江上人禪室

路入松聲遠更奇山光水色共參差中峰禪寂一僧在  
坐對梁朝老桂枝

題秦系山人麗句亭

獨將詩教領諸生，但愛青山不愛名。  
滿院竹聲堪愈疾，亂牀花片足忘情。

奉和顏使君修韻海畢州中重宴得雙字

世學高南郡，身封盛魯邦。  
九流宗韻海，七字揖文江。  
惜賞雲歸堞，留歡月在窓。  
不知名教樂，千載與誰雙。

游溪待月

溪色思泛月，沿洄欲未歸。  
殘燈逢水店，疎磬憶山扉。  
夜

浦魚驚少空林鵲遠稀可中纔望見撩亂擣寒衣

往丹陽尋陸處士不遇

遠客殊未歸我來幾惆悵叩關一日不見人繞屋寒花  
笑相向寒花寂寂遍荒阡柳色蕭蕭愁暮蟬行人無數  
不相識獨立雲陽古木邊鳳翅山中思古寺魚竿村口  
望歸船歸船不見見寒煙離心遠水共悠然他日相期  
那可定閒僧著處即經年

寄常一上人

雁塞五山臨汗漫雲州一路出青冥何因請住嘉祥寺  
內史新修湖上亭

贈柳喜自號嵩山老

一見嵩山老吾生恨太遲問君年幾許曾出上皇時

酬秦系山人見寄

左右香童不識君擔簦訪我領鷗羣山僧待客無俗物  
惟有窓前片碧雲

聽寒更寄朱巨川

歌枕聽寒更寒更發還住一夜千萬聲幾聲到君處

秋居法華寺下院望高頂贈如獻上人

峰色秋天見松聲靜夜聞影孤長不出行道在深雲

送沈秀才之閩中得過字

楚客未成歌春風起綠波嶺重寒不到海遠瘴偏多野  
戍桄榔發人家翡翠過翻疑此中好君問定如何

送履霜上人還金陵西山

攜錫西山步綠莎禪心未了奈情何湘宮水寺清秋夜

月落風悲松柏多

送顧道士遊洞庭

見說洞庭無上路春遊亂踏五靈芝  
含桃風起花狼籍正是仙翁棊散時

送邢台州濟

海上仙山屬使君石橋琪樹古來聞  
他時畫出白團扇乞取天台一片雲

冬日梅溪送裴方舟之宣州

平明匹馬上村橋  
花發梅溪雪未消  
日短天寒愁送客  
楚山無限路遙遙

送秘上人遊京

共居方異路  
山伴與誰同  
日冷行人少  
時清古鎮空  
煖瓶和雪水  
鳴錫帶江風  
撩亂終南色  
遙應入夢中

送贇上人還京得微字

久遊春草盡  
還寄北船歸  
沙鳥窺中食  
江雲入淨衣  
秦原山色近  
楚寺磬聲微  
見說翻經館  
多聞似爾稀

送李秀才赴盧婺州招得時字

山開江上色孤賞去應遲綠水延吳榜秋風入楚詞猿  
清獨宿處木落遠行時見說東陽守登樓為爾期

銅雀妓

強開樽酒向陵看憶得君王舊日歡不覺餘歌悲自斷  
非關艷曲轉聲難

長門怨

春風日日閉長門搖蕩春心似夢魂若遣花開只笑妾



不知桃李自無言

啼猿送客

萬里巴江外三聲月峽深何年有此路幾客共沾襟斷  
臂分垂影流泉入苦吟淒涼離別後聞此更傷心

江上風

江風西復東飄暴忽何窮初生虛無際稍起蕩漾中應  
吹夏口檣竿折定感湓城浪花咽今朝莫怪沙岸明昨  
夜聲狂捲成雪

夏日登觀農樓和崔論使君詠微雨

片雨拂簷楹煩襟四座清  
霏微過麥隴蕭散傍莎城  
靜愛和花落幽聞入竹聲  
朝觀趣無限高詠寄閒情

南樓望月

夜月家家望亭亭愛此樓  
纖雲溪上斷疎柳影中秋  
漸映千峰出遙分萬派流  
關山誰復見應獨起邊愁

詠史

田氏門下客馮公衆中賤  
一朝市義還百代名獨擅  
始

知下客不可輕能使主人功業成借問高車與珠履何  
如卑賤一書生

送常清上人歸舒州

瀟人思爾法楚信有回船估客親宵話聞鷗偶晝禪經  
聲含石浪塵尾拂江煙常說歸山意誅茅廬霍前

送志洪沙彌赴上元受戒

上元江中有  
蔡洲古戒壇

不肯資章甫勝衣被木蘭今隨秣陵信欲及蔡洲壇野  
寺鐘聲遠春山戒足寒歸來次第學應見後心難

送烏程李明府得陟狀赴京

驛吏滿江城深仁見此情士林推玉振公府薦冰清為  
政移風久承恩就日行仲容綸綍貴南巷有光榮

尋陸鴻漸不遇

移家雖帶郭野徑入桑麻近種籬邊菊秋來未著花扣  
門無犬吠欲去問西家報道山中去歸時每日斜

懷舊山

或作滄浩

一坐西林寺從來未下山不因尋長者無事到人間宿

雨愁為客寒花笑未還空懷舊山月童子念經間

送稟上人遊越

雲泉誰不賞獨見爾情高投宿輕龍窟臨流笑鷺濤折  
荷為片席灑水淨方袍剡路逢禪侶多應問我曹

從軍行

黃紙君王詔青泥校尉書誓師張虎落選將擐犀渠霧  
暗津蒲失天寒塞柳疏橫行十萬騎欲掃虜塵餘

隴頭水

隴頭心欲絕隴水不堪聞  
碎影搖槍壘寒聲咽幔軍  
素從鹽海積綠帶柳城分  
日落天邊望逶迤入塞雲

塞下曲二首

寒塞無因見落梅朔風吹入笛聲來  
勞勞亭上春應度  
夜夜城南戰未回

都護今年破武威黃沙萬里鳥空飛  
旂竿瀚海掃雲出  
羣騎天山踏雪歸

支公詩

支公養馬復養鶴率性無羈多脫畧天生支公與凡異  
凡情不到支公地得道由來天上仙為僧却下人間寺  
道家諸子論自然此公惟許逍遙篇山陰詩友喧四座  
佳句縱橫不廢禪

宿吳匡山破寺

與餘不溪廢  
寺詩畧同

雙峰百戰後真界蒲塵埃蔓草緣空壁悲風起故臺野  
花寒更發山月暝還來何事池中水東流獨不回

少年行

翠樓春酒蝦蟆陵長安少年皆共矜紛紛半醉綠槐道  
蹉跎花驄驕不勝

春日杼山寄李縱員外

南山惟與北山鄰一閉禪關老此身

一作古樹連  
拳伴我身

黃鶴

有心多不住白雲何

一作無

事獨相親閒持竹杖行

一作深

看水嬾著麻衣出見人無限幽芳徒欲寄

一作欲投幽  
芳聊贈遠

郎官那賞石門春

宿法華寺簡靈澈上人



至道無機但杳冥孤燈寒竹自青熒不知何處小乘客  
一夜風前聞誦經

九月十日

愛殺柴桑隱名溪近訟庭掃沙開野步搖舸出間汀宿  
簡邀詩伴餘花在酒瓶悠然南望意自有峴山青

晚秋破山寺

秋風落葉滿空山古寺殘燈石壁間昔日經行人去盡  
寒雲夜夜自飛還

青陽上人院說金陵故事

君說南朝金盛日秣陵才子最多人  
千年秋色古池館誰見齊王西邸春

送僧之京師

綿綿渺渺楚雲繁萬里西歸望國門  
禪子初心易悽斷秋風莫上少陵原

送許丞還洛陽

剡茗情來亦好斟空門一別肯沾襟  
悲風不動罷瑤軫

忘却洛陽歸客心

題湖上草堂

山居不買剡中山湖上千峰處處間  
芳草白雲留我住世人何事得相關

唐僧弘秀集卷一

欽定四庫全書

唐僧弘秀集卷二

宋 李龔 編

靈澈十一首

聽鶯歌

新鶯傍簷曉更悲孤音清冷轉素枝口邊血出語未盡  
豈是怨恨人不知不食枯桑葢不銜苦李花偶然弄樞  
機婉轉凌煙霞衆雛飛鳴何跼促自覘游蜂啄枯木玄

猿何事朝夜啼白鷺長在汀洲宿黑鵑黃鶴豈不高金  
籠玉鈎傷羽毛三江七澤去不得風煙日暮生波濤飛  
去來莫上高城頭莫下空園裏城頭鳴烏拾羶腥空園  
燕雀爭泥滓願當結舌含白雲五月六月一聲不可聞

送鑒供奉歸蜀寧親

林間出定戀庭闈聖主恩深暫許歸雙樹欲辭金錫冷

世尊入滅于  
婆羅雙樹

四花猶向玉階飛

四花曼殊沙摩訶曼陀  
羅摩訶曼殊沙此云柔

軟曼陀羅此  
云適意也

梁山拂漢分清境蜀雪和煙惹翠微此去

不須求綵服紫衣全勝老萊衣

朝廷賜僧衣曰紫衣

九日和于使君思上京親故

清晨有高會賓從出東方楚俗風煙古汀洲水木涼山  
情來遠思菊意在重陽心憶華池上從容鷓鴣行

宿東林寺

天寒猛虎嘯巖穴林下無人空有月千年像教今不聞

興像教龍樹大師也焚香獨為鬼神說

東林寺酬韋丹刺史

年老心閒無外事  
麻衣草座亦容身  
相逢盡道休官好  
林下何曾見一人

答徐廣州四問

童子出家無第行  
隨師乞食遣稱名  
長沙豈敢論年幾  
絳老惟知甲子生

遠公墓

古墓石稜稜  
寒雲晚景凝  
空悲虎溪月  
不見雁門僧

歸湖南



山邊水邊待月明暫向人間借路行如今還向山邊去  
只有湖水無行路

簡寂觀

古松古栢巖壁間猿攀鶴巢古枝折五月有霜六月寒  
時見山翁來取雪

聞李處州亡

時時聞說故人死日日自悲垂老身白髮不生應不得  
青山長在屬何人

天台山華頂峰

天台衆峰外華頂當寒空有時半不見崔嵬在雲中

靈一二十八首

棲霞山夜坐

山頭戒壇路幽映雪巖側四面青石牀一峰苔蘚色松  
風靜復起月影開還黑何獨乘夜來殊非畫所得

宿天柱觀

石室初投宿仙翁喜暫容花源隔水見洞府過山逢泉

湧塔前地雲生戶外峰中宵自入定非是欲降龍

酬皇甫冉將赴無錫於雲門寺贈別

湖南通古寺來徃意無涯欲識雲門路千峰到若耶  
春山子敬宅古木謝敷家自可長偕隱那言相去賒

宜豐新泉

泉源新湧出洞澈映纖雲稍落芙蓉沼初淹苔蘚素  
將空意合淨與衆流分每到清宵月泠泠夢裏聞

靜林精舍

靜林溪路遠蕭帝有遺蹤  
水擊羅浮磬山鳴于闐鐘  
燈傳三世火樹老萬株  
松無數煙霞色空聞昔臥龍

江行寄張舍人

客程終日風塵苦蓬轉還家未有期  
林色曉分殘雪後角聲寒奏落帆時  
月高星使東看遠雲破霜鴻北度遲  
流蕩此心難共說千峰澄霽隔瓊枝

送王穎悟

客意天南興已闌不堪言別向仙官夢  
搖玉珮隨旌節

心到金華憶杏壇荒郊極望歸雲盡瘦馬空嘶落日殘  
想得故山青靄裏泉聲入夜獨潺潺

安公

彌天稱聖哲象法初繫賴弘道識行藏匡時知進退秦  
王輕與舉習生重酬對學文古篆中義顯新經內法服  
應華夏金言流海岱西方浮雲間更倍龍花會

林公

支公信高逸久向山林住時將孫許遊豈以形骸遇幸

辭天子詔復覽名臣疏西晉尚虛無南朝久淪悞因談  
老莊意乃盡逍遙趣誰為竹林賢風流相比附

遠公

遠公逢道安一朝棄儒服真機久消歇世教空拘束誓  
入羅浮中遂棲廬山曲禪經初纂定佛語新名目鉢帽  
絕朝宗簪裾翻拜伏東林多隱士為我辭榮祿

雨後欲尋天目山問元駱二公溪路

昨夜雲生天井東春山一雨一回風林花併逐溪流下

欲上龍池通不通

題王僧院

虎溪閒月引相過帶雪松枝挂薜蘿無限青山行欲盡  
白雲深處老僧多

宿靜林寺

山寺門前多古松溪行欲到已聞鐘中宵引領尋高頂  
月照雲峰凡幾重

再還宜豐寺

再尋招隱地重會息心期樵客問歸日山僧記別時野  
雲陰遠甸秋雨漲前陂勿謂探形勝吾今不好奇

酬陳明府舟中見贈

長溪通夜靜素舸與人閒月影沈秋水風聲落暮山稻  
花千頃外蓮葉兩河間陶令多真意相思一解顏

題東蘭若

上人禪室路徘徊萬木清陰向日開寒竹影侵行道石  
秋風聲入誦經臺閒雲不繫從舒卷狎鳥無機任往來



更惜片陽談妙理歸時莫待暝鐘催

送朱放

苦見人間世思歸洞裏天縱令山鳥語不廢野人眠

歸岑山過惟審上人別業

禪客無心憶薜蘿自然行徑向山多知君欲問人間事  
始與浮雲共一過

於潛道中作呈元八處士

茗水灘行淺潛州路漸深參差遠岫色迢遞野人心凍

澗水難釋秋山月易陰不知天目下何處是雲林

送殷判官歸上都

漾舟雲路客來過夕陽時向背堪遺恨逢迎宿未期水  
容愁暮急花影動春遲別後王孫草青青入夢思

贈別皇甫曾

幽人從遠岳過客愛春山高駕能相送孤遊且未還紫  
苔封井石綠竹掩柴關若到雲峰外齊心去住間

送陳元初卜居麻源

欲向麻源隱能尋謝客蹤  
空山幾千里幽谷第三重  
茅宇寧須葺荷衣不待縫  
因君見往事為我謝喬松

秋題劉逸人林泉

涼飈亂黃葉遲客橘陰清  
蘿徑封行跡雲門閉野情  
零林秋露響穿竹暮煙輕  
莫戀幽棲地懷安却敗名

自大林與韓明府歸郭中精舍

野客同舟楫相攜復一歸  
孤煙生暮景遠岫帶春暉  
不道還山是誰云向郭非  
禪門有通隱喧寂共忘機

同使君宿大梁驛

或作清江

旌旗江上出花外捲簾空夜色臨城月春寒度水風雖然行李別且喜語音同若問匡廬事終身媿遠公

題黃公陶翰別業

聞說花源堪避秦幽尋數月不逢人煙霞洞裏無雞犬風雨林中有鬼神黃公石上三芝秀陶令門前五柳新醉卧白雲間作夢不知何物是吾身

哭衛尚書

畫戟重門楚水陰天涯欲暮共傷心南荆雙履痕猶在  
北斗孤寬望已深蓮花幕下悲風起細柳營邊曉月臨  
前路茫茫向誰問感君空有淚沾襟

贈靈澈禪師

禪師來往翠微間萬里千峰到剡山何時共到天台裏  
身與浮雲處處間

惟審二首

春日旅懷呈知己

生涯萬事有蒼蒼應任流萍便越鄉春水獨行人漸遠  
故園歸路夜空長一聲隔浦猿啼處數滴驚心淚滿裳  
不為知音皆鮑叔信誰江上去茫茫

賦得聞黃鳥啼

捲簾清夢後芳樹引流鶯隔葉傳春意穿花送曉聲未  
調雲路翼空負桂林情莫盡關關興羈愁正厭生

唐僧弘秀集卷二

欽定四庫全書

唐僧弘秀集卷三

宋 李龔 編

護國十首

題王喬觀傳道士所得

王喬已去空山觀白雲只今凝不散壇場月露幾千年  
徃徃笙歌下天半瀑布西行過石橋黃精採根還採苗  
忽見一人擎茶碗蓼花昨夜風吹滿自言住處在東坡

白犬相隨邀我過松間石上有棋局能使樵人爛斧柯

歸山作

喧靜各有路偶隨心所安縱然好朝市終不忘林巒四  
皓將拂衣二疏能挂冠窓前隱逸傳每日三時看蘄尚  
那可論屈原亦可歎至今黃泉下名及青雲端松牕見  
初月花間禮古壇何處論心懷世上空漫漫

別盛安

情人取次幾淹留別後南州與北州月色為憐今夜客



砧聲那似去年秋欲除豺虎論三畧莫對雲山詠四愁  
親故相逢且借問古來無種是王侯

逢靈道士

浮丘山上見黃冠松柏森森登古壇一莖青竹以為杖  
數顆仙桃仍未餐長安市裏常賣卜武陵溪畔每燒丹  
縮地往來無定所花源到處路漫漫

傷蔡處士

篋中遺草是琅玕對此空令灑淚看三徑尚餘行跡在

數螢猶是映書殘晨光不借泉門曉暝色惟添壠樹寒  
欲問皇天天更遠有才無命說應難

訪雲母山僧

森然古巖裏淨行一番僧松下瀘寒水佛前挑夜燈蓮  
花國土異貝葉梵書能想到空王境無心問愛憎

題王班水亭

湖上見秋色曠然如爾懷豈惟歡隴畝兼亦外形骸待  
月歸山寺彈琴坐暝齋布衣閒自貴何用謁天階

許州鄭使君孩子

毛骨貴天生肌膚片玉明  
見人空解笑弄物不知名  
國器嗟猶小門風望益清  
抱來芳樹下時引鳳雛聲

愴故人舊居

惆悵至日暮寒鴉啼樹林  
破堦苔色厚殘壁雨痕深  
命與時不遇福為禍所侵  
空餘行徑在令我歎人吟

臨川道中

出谷入谷路回轉秋風已至  
歸期晚舉頭何處望來蹤

萬仞千山鳥飛遠

無可二十五首

遊山寺

千峰盤路盡林寺昔何名步步入山影房房聞水聲多  
年人跡絕殘日石陰清自可求居止安閒過此生

寄青龍寺原上人

斂屨入寒竹安禪過漏聲高杉殘子落深井凍痕生罷  
磬風枝動懸燈雪屋明何當招我宿乘月上方行

秋寄從兄賈島

暗蟲喧暮色默坐思西林聽雨寒更盡開門落葉深昔  
因京邑病併起洞庭心亦是吾兄事遲回直至今

送李騎曹之武寧

一歲一歸寧涼天數騎行河來當塞曲山遠與沙平縱  
獵旗風卷聽笳帳月生新鴻引寒色回日滿京城

秋日寄厲玄先輩

楊柳起秋色故人猶未還別離俱自老少壯豈能閒夜

雨吟殘燭秋城憶遠山何當一相見語默此林間

贈詩僧

寒山對水廊竹葉影侵堂洗藥水生岸開門月滿牀病  
多身又老枕倦夜兼長來謁吾僧者呈詩問否臧

送呂郎中赴滄州

出守滄州去西風送旆旌路遙經幾郡地盡到孤城拜  
廟千山綠開樓遍海清何人共東望日向積濤生

書馬如文石門居

別業逸高情暮泉喧客亭林回天闕近雨過石門青野  
果誰來拾山禽獨卧聽要迎文會友時復掃柴局

送章正字秩蒲東歸

朝衣登別席春色蒲秦關芸閣吏誰替海門身又還尋  
僧流水僻見月遠林間雖是忘機者難齊去住間

送姚宰任吉州安福縣

落絮滿衣裳攜琴問水鄉挂帆南入楚到縣半浮湘吏  
散翠禽下庭間斑竹長人安宜遠泛沙上蕙蘭香

送李少府之任臨邛

邛南方作尉調補一何卑  
發論惟公幹承家乃帝枝  
山長風裊棧江陰石和澌  
舊井王孫宅還尋獨有期

送僧歸中條

夜葉動飄飄寒來話數宵  
卷經歸物外轉雪下山椒  
舊坐松杉大難行水石遙  
元戎宗內學應就白雲招

贈圭峰禪師

絕壑禪床底泉分落石層  
霧交高頂草雲隱下方燈  
朝



滿傾心客谿通學道僧半旬持一食此行有誰能

金州別姚合

日日西亭上春留到夏殘言之離別易勉以道途難  
山出一千里溪行三百灘松間樓裏月秋入五陵看

隕葉

遶巷夾溪紅蕭條逐北風別林遺宿鳥浮水載鳴蟲  
石小埋初盡枝長落未終帶霜書麗什閒讀白雲中

李常侍書堂

結構因墳籍簷前竹未生  
塗油窓日早閱槩幌風輕息  
架蛩驚客垂燈雨過城已應窮  
古史師律孰齊名

送邵錫及第歸湖州

春闕烏啼罷歸慶浙煙西  
郡守招延重鄉人慕仰齊橘  
青逃暑寺茶綠隔湖溪乘暇知  
高眺微應辨會稽

送清散遊太白山

卷經歸太白躡躡鮮別蘿龕  
若履浮雲上須看積翠南倚  
身松入漢瞑日月離潭此境堪  
長往塵中事可諳

冬晚姚諫議宅會送元緒上人歸南山

禪客詩家見凝寒忽告還分題回諫筆留偈出商關盤  
徑緣高雪開房在半山自知麋鹿性亦欲離人間

春晚喜悟禪師自瑠璃上方見過

瑠璃師到城談性外諸經下嶺雪霜在近人林木清苔  
痕深草履瀑水滴銅瓶樂問山中事宵言徹曉星

秋暮與諸文士集宿姚端公所居

宵清月復圓共集侍臣筵獨寡區中學空論樹下禪風

多秋晚竹雲盡夜深天此會東西去堪愁又隔年

冬中聞從兄島遊蒲絳因寄

遙遙行李心蒼野入寒深吟待黃河雪眠聽絳郡砧差  
期逢缺月訪信出空林何處孤燈下只聞嘹唳禽

送李長官之任東井


江盤棧轉虛候吏拜行車家世維城後官資宰邑初市  
饒黃犢賣田躡白雲鉏萬里千山路何因欲寄書

宿安國簡公院

雨後清涼境因過欲不回井甘桐有露竹迸地多苔  
映宮牆動香從御苑來青龍舊經疏寥落有誰開

夏日送崔秀才

南方山水地念子為貧遊縱是逢佳景那能緩旅愁  
夕陽行遠道煩暑在孤舟莫向巴山過猿啼感淚流



唐僧弘秀集卷三

欽定四庫全書

集部

唐僧弘秀集卷四至七

詳校官中書<sub>臣</sub>張姚成

助教<sub>臣</sub>常循覆勘

總校官編修<sub>臣</sub>王燕緒

校對官典簿<sub>臣</sub>郭祚熾

謄錄監生<sub>臣</sub>王肇濬

欽定四庫全書

唐僧弘秀集卷四

宋 李龔 編

清塞四十五首

留辭杭州姚合郎中

波濤千里隔抱疾亦相尋  
會宿逢高燒辭歸值積霖  
叢桑山店迴孤燭海船深  
尚有重來約知無省閣心

送分定歸靈夏



南遊多老疾見說講經稀  
塞寺幾僧在關城空自歸  
帶河衰草斷映月早沙飛  
却到禪齋後邊軍識衲衣

酬吳之問見贈

已當聽鴈夜多事不同居  
故疾離城晚秋霖見月疎  
超鐘闕靜戶帶葉卷殘書  
盪槩期南去荒園久廢鉏

送康紹歸建業

南朝秋色滿君去意如何  
帝業空城在民田壞塚多月  
圓臺獨上栗綻寺頻過  
籬下西江水相思見白波

送耿山人歸湖南

南行隨越僧舊業一池菱兩髻已垂雪五湖歸挂罾夜  
濤鳴柵鎖寒葦露船燈此去應無事却來期未能

休糧僧

一齋難過日況是更休糧養力時行道聞鐘不上堂惟  
留煨藥火豈寫化金方舊有山廚在從僧請作房

贈李主簿

稅時兼主印每日得閒稀對客方科吏為官亦典衣案

遲吟坐待宅近步行歸見說論詩道應愁斷是非

栢巖禪師

野寺絕依念空山曾遍行老來披衲重病起讀經生乞食嫌村遠尋溪愛路平多年栢巖住不識栢巖名

宿開元寺樓

西峰殘日落誰見寂寥心孤枕客眠久兩廊僧話深寒扉闕雨氣風葉隱鐘音此愛東樓望仍期別夜尋

送僧還南嶽

辭僧下水棚因聽嶽鐘聲遠路獨歸寺幾時重到城風  
高寒葉落雨絕夜堂清自說深居後隣州亦不行

春日重至南徐舊居

綠水陰空院春深喜再來獨眠從草長留酒看花開過  
雨遠山出向風孤雁回忽思秋夕事雲物却悠哉

送僧歸江南

洗足北林去遠途今已分麻衣行嶽色竹杖帶湘雲飢  
鼠緣危壁寒狸出壞墳前峰一聲磬此夕不同聞

贈朱慶餘校書

風泉盡結冰寒夢徹西陵越信楚城得遠懷中夜興樹  
停沙島鶴茶會石橋僧寺閣連官舍行吟過幾層

尋北岡韓處士

相過值早涼松帚掃山房坐石泉痕黑登城蘚色黃逆  
風沈寺磬初日耀隣桑幾處逢僧說期來宿北岡

逢播公

帶病稀相見西城早晚來衲衣風壞帛香印雨沾灰坐

久鐘聲盡談餘嶽影回却思同宿夜高枕說天台

入靜隱寺途中作

亂雲迷遠寺入路認青松鳥道緣巢影僧鞋印雪蹤草  
煙連野燒溪霧隔霜鐘更過樵人問猶言過數峰

冬日山居思鄉

大野始嚴凝雲天曉色澄樹寒稀宿鳥山迴少來僧背  
日收窓雪開爐釋硯冰忽然歸故國孤想寓西陵

送幻羣法師

北京從別後南越幾聽砧住久白髭出講長黃葉深香  
連隣舍像磬徹遠巢禽寂默應關道何人見此心

玉芝觀王道士

四面松杉合空堂畫老仙蠹根停雪水曲角積茶煙道  
至機心盡宵清琴韻全暫來還入去不得坐經年

出關後寄賈島

故國知何處西風已度關歸人值落葉遠路入寒山多  
難喜相識久貧寧自閒惟將來徃信遙慰別離顏

春喜友人至山舍

鳥鳴春日晚喜見竹門開路自高巖出人騎瘦馬來折  
花林影動移石澗聲回更欲留深語重城暮色催

留別南徐故人

三年蒙見待此夕是前程未斷却來約且伸臨去情潮  
回灘鳥下月上客船明他日南徐道緣君又重行

書實上人房

絕頂言無伴長懷落髮師齋歸門掩雪講徹樹生枝沙



井泉澄疾秋鐘韻盡遲里中還受請又爽赤城期

早秋過郭涯書堂

暑消岡舍清閒語有餘情石水生茶味松風減扇聲遠  
分臨海雨靜覺掩山城此地秋吟苦時來遶菊行

哭間霄上人

林逕西風急松枝講鈔餘凍髭亡夜剃遺偈病時書地  
燥焚身後堂空著影初此來頻下淚曾省到吾廬

送張諲之睦州

遙憶新安舊扁舟往復還淺深看水石來往逐雲山到  
縣餘花在過門五柳間東征隨子去俱隱薜蘿間

題何氏池亭

信是虛閒地亭亭亦有苔繞池逢石坐穿竹到山回果  
落纖萍散龜行細草開主人偏好事終不厭頻來

贈道士

藥力資蒼髻應非舊日身一為嵩嶽客幾葬洛陽人石  
縫瓢探水雲根斧斷新關西來往路誰得水銀銀

送表兄東南遊

山水疊層層吾兄涉又登挂帆春背雁尋磬夜逢僧雪  
溜懸南嶽江雲蓋秣陵評文永不忘此說是中興

晚秋江館寄姚郎中

病寄曲江居帶城傍門孤柳一蟬鳴澄波月上見魚擲  
荒徑葉乾聞犬行越島夜無侵閣色寺鐘寒有隔源聲  
故園賣盡休歸去湖水秋來空自平

同徐處士秋懷少室故居

曾居少室黃河畔秋夢長懸未得回扶病半年離水石  
思歸一夜隔風雷荒齋幾遇僧眠後野菊頻經鹿踏來  
燈下此心君共說傍松幽徑幾多苔

贈道人

布褐高眠石竇春迸泉多濺黑紗巾搖頭說易當朝客  
落手圍碁對俗人自算天年窮甲子誰同雨夜守庚申  
擬歸太華何時去他日相尋乞藥銀

寄新頭陀

見說北京尋祖後瓶盂自挈遶窮邊相逢竹塢晦暝夜  
一別苕溪多少年遠洞省穿湖底過斷崖曾向壁中禪  
青城不得師同住坐想滄江意浩然

湘漢旅懷傑公

一宿空江聽急流仍同賈客坐歸舟遠書來隔巴陵雨  
衰鬢去經彭蠡秋不擬為身謀舊業終期斷穀隱高丘  
吾宗尚作無慘者中夜廢吟生旅愁

寄韓司兵

多病十年無舊識  
滄州亂後始逢君  
已知罷秩辭瀧水  
相勸移家住嶽雲  
泗上旅帆侵疊浪  
雪中歸路踏荒墳  
更為此別愁應老  
書劄何由到北軍

贈姚合郎中

望重來為守土臣  
清高還似武功貧  
道從會解惟求靜  
詩造玄微不趁新  
玉帛已知難撓思  
雲泉終是得閒身  
兩衙向後長無事  
門館多逢請益人

贈厲玄侍御

山松徑與瀑泉通巾舄行吟想越中塞雁去經華頂末  
鄉僧來自海濤東關分河漢秋鐘絕露滴彌猴夜獄空  
抱疾因尋周柱史杜陵寒葉落無窮

上陝府姚中丞

此心長愛狎禽魚仍候登封獨著書領郡只嫌生藥少  
在官長恨與山疎成家盡是經綸後得句應多諫諍餘  
見說養真求退靜溪南泉石許同居

送韓評事

門枕平湖秋景好水煙松色遠相依罷官餘俸租田種  
送客回舟載石歸離岸遊魚逢浪返望巢寒鳥逆風飛  
嵩陽舊隱多時別閉目閒吟憶翠微

宿隱靜寺上方

一宿五峰杯渡寺虛廊中夜磬聲分疎林未落上方月  
深澗忽生平地雲幽鳥背泉栖靜境遠人當燭想遺文  
暫來此地歇勞足望斷故山滄海濱

宿李主簿林亭



獨樹倚亭新月入城牆四面鎖山多去年今夜還來此  
坐見西風裊燕窠

送宗禪師

衡陽一別十三春行脚同來有幾人老大却思歸嶽寺  
當時未漆祖師身

送蜀僧

萬里獨行無弟子惟齋筇竹與檀龕看經更向吳中老  
應是山川似劍南

過僧竹院

一生愛竹自未有每到此房歸不能高人留宿話禪後  
寂寞雨堂空夜燈

送僧

草屨初登南客船銅瓶猶貯北山泉衡陽舊寺秋歸後  
門鎖寒潭幾樹蟬

唐僧弘秀集卷四

欽定四庫全書

唐僧弘秀集卷五

宋 李龔 編

文益二首

觀木平和尚

木平山裏人貌古言復少  
相看陌路同論心秋月皎  
壞衲線非蠶助歌聲有鳥城闕  
今日來一漚曾已曉

看牡丹

擁毳對芳叢由來趣不同髮從今日白花是去年紅艷  
曳一作色隨朝露馨香逐晚風何須待零落然後始知空

可止四首

山居

雪消春力展花漫洞門垂果長纖枝曲巖崩直道移重  
猿圍淺井鬪鼠下疎籬寒食微燈在高風勢徹陂

寄積麥山會如長老

默然知大道塵世不相關青檜行時靜白雲禪處閒貧

高一生行病長十年顏夏滿期遊寺尋山又下山

送僧

四海無拘繫行心興自濃百年三事衲萬里一枝筇夜  
減當晴影春消過雪蹤白雲深處去知宿在何峰

哭賈島

燕生松雪地蜀死葬山根詩僻降今古官卑悞子孫塚  
欄寒月色人哭苦吟魂暮雨滴碑字年年添蘚痕

清江十三首

夕次襄邑

何處成吾道經年遠路中客心猶向北河水自歸東古  
戍鳴寒角疎林振夕風輕舟惟載月那與故人同

嚴秘書宅會章八元

佳期曾不遠甲第即南隣惠愛偏相及經過豈厭貧秋  
寒林葉動夕霽月華新莫話羈栖事平原是主人

贈淮西賈兵馬使

破虜功成百戰場天書新拜漢中郎映門旌旆春風起

對客絃歌白日長  
堦下鬪雞花乍發  
營南試馬柳初黃  
由來吳楚多同調  
感激逢君共異鄉

送堅上人歸杭州天竺寺

十年勞負笈  
經論化中朝  
流水知鄉近  
和風惜別遙  
雲山零夜雨  
花岸上春潮  
歸卧南天竺  
禪心更寂寥

送贊律師歸嵩山

禪意歸心急  
山深定易安  
清貧修道苦  
孝友別家難  
雪路尋溪轉  
花宮映嶽看  
到時瞻塔暮  
松月向人寒



上郡訓章十八兄

每歎經年別人生有幾年關河長問道風雨獨隨緣寓  
蝶成莊夢懷人識禰賢徽猷不及此空媿白華篇

登樓望月寄鳳翔李少尹

陌上涼風槐葉凋夕陽清露溼寒條登樓望月楚山上  
月到南樓山獨遙心送秦人超鳳闕目隨陽雁極煙霄  
軒車不重無名客此地誰能訪寂寥

湘州懷古

瀟湘連汨羅復對九疑河浪勢屈原塚竹聲漁父歌地  
荒征騎少天暖浴禽多脈脈東流水古今同奈何

七夕

七夕景迢迢相逢只一宵月為開帳燭雲作渡河橋映  
水金冠動當風玉珮搖惟愁更漏促離別在明朝

長安卧病

身世足堪悲空房卧病時卷簾花雨滴掃石竹陰移已  
覺生如夢堪嗟壽不知未能通法性詎可免支離

送婆羅門僧

雪嶺金河獨向東  
吳山楚澤意無窮  
如今白首鄉心盡  
萬里歸程在夢中

精舍遇雨

空門寂寂淡吾身  
溪雨微微洗客塵  
卧向白雲情未盡  
任他黃鳥醉芳春

小雪

江雪臨風不厭看  
更多還恐蔽林巒  
愁人正在書窓下

一片飛來一片寒

法照三首

寄錢郎中

閉門深樹裏間足為經過  
駟馬不為貴一僧誰奈何  
藥苗家自有香飯乞時多  
寄語嬋娟客將心向薜蘿

送清江上人

越人僧體古清慮洗塵勞  
一國詩名遠多生律行高  
見山援葛藟避世著方袍  
早晚雲門去儂應逐爾曹

送無著禪師歸新羅國

萬里歸鄉路隨緣不筭程  
尋山百衲弊過海一杯輕  
夜宿依雲色晨齋就水聲  
何年持貝葉却到漢家城

寶月一首

行路難

君不見孤雁關外發酸嘶度揚越  
空城客子心腸斷幽閨思婦氣欲絕  
凝霜夜下拂羅衣浮雲中斷開明月  
夜夜遙遙徒相思年年望望情不歇  
取我匣中青銅鏡倩

人為君除白髮行路難行路難夜間南城漢使度使我  
流淚憶長安

廣宣七首

駕幸天長寺應制

天界宜春賞禪門不掩關宸遊雙闕外僧引百花間車  
馬喧長路煙雲淨遠山觀空復觀俗皇鑒此中間

九日菊花詠應詔

可訝東籬菊能知節候芳細枝青玉潤繁蕊碎金香爽

氣浮朝露濃姿帶夜霜泛杯傳壽酒應共樂時康

駕幸聖容院應制

大唐國裏千年聖王舍城中百億身却指容顏非我相  
自言空色是吾真深殿虔心隨寶輦廣庭徐步引金輪  
古來貴重緣親近狂客慙為侍從臣

聖恩顧問獨遊月磴閣直書其事應制

禪居河畔無多地來往尋春物正華磴道上盤千畝竹  
欄干低數萬人家簷前施飯來飛鳥林下行香踏落花

自解剎那知佛性不勞更喻幾塵沙

安國寺隨駕幸興唐觀應制

東林何殿是西隣  
禪客垣牆接羽人  
萬乘遊仙宗有道  
三車引路本無塵  
初傳寶訣長生術  
已證金剛不壞身  
兩地盡修天上事  
共瞻鑾駕重來巡

三車謂羊車鹿車牛車玄門亦有三

車謂穴也

早秋降誕日獻壽二首應制

秋蔘開六葉  
元聖誕千年  
繞殿祥風起  
當空瑞日懸  
道



光中國主人識大羅仙敢贊無疆壽香花上法筵

其二

萬方瞻聖日九土仰清光罄地山河壯彌天福壽長瑞  
烟薰法界真偈啟仁王看獻千秋樂千秋樂未央

唐僧弘秀集卷五

欽定四庫全書

唐僧弘秀集卷六

宋 李龔 編

貫休六十一首

古意六首

一雨火雲盡閉門  
心冥冥蘭花與芙蓉  
滿院同芳馨  
佳人天一涯  
好鳥鳴嚶嚶  
我有雙白璧  
不羨於虞卿  
我有徑寸珠  
別是天地精  
玩之室生白  
瀟灑身安輕  
只應天

上人見我雙眼明

其二

陽鳥爍萬物草木懷春恩茫茫塵土飛培擁名利根我  
本事蓑笠那知天子尊學為毛氏詩亦多直致言不慕  
蠕蠕類附勢同崩奔惟尋桃李蹊去去長者門

其三

美人如游龍被服金鴛鴦手把古刀尺在彼白玉堂文  
章深掣曳珂珮鳴叮璫好風吹桃花片片落銀牀何當

舉羽翰遠逐朱鳥翔

其四

乾坤有清氣散入詩人脾  
聖賢遺清風不在惡木枝  
千人萬人中一人兩人知  
憶在東溪日花開葉落時  
幾擬以黃金鑄作鍾子期

其五

古交如真金百鍊色不回  
今交如暴流倏忽生塵埃  
我願君子氣散為松柏  
栽我恐荆棘花只為小人開  
傷心

復傷心吟上高高臺

其六

莫輕白雲白不與風雨會莫見守羊兒謂是初平輩人  
生非日月光輝豈長在一榮與一辱今古常相對不見  
于公門子孫好冠蓋

行路難

君不見山高海深人不測古今往來轉青碧淺近輕浮  
莫與交地卑只解生荊棘誰道黃金如糞土張耳陳餘

斷消息行路難行路難君自看

其二

不會當初作天地剛有多般愚與智到頭還用真宰心  
何如上下皆清氣大道冥冥不知處那堪頓得義和轡  
義不義兮仁不仁擬學長生更容易負薪為爐復為火  
緣木求魚應且止君不見燒金煉石古帝王鬼火熒熒  
白楊裏

其三

君不見道傍廢井生古木本是驕奢貴人屋幾度美人  
照影來素綆銀瓶濯纖玉雲飛雨散今如此繡闥雕甍  
作荒谷沸渭笙歌君莫誇不應長是西家哭休說遺編  
行者幾至竟終須合天理敗他成此亦何功蘇張終作  
多言鬼行路難行路難不在羊腸裏

輕薄篇 二首

繡林錦野春態相壓誰家少年馬蹄蹋蹋鬪雞走狗夜  
不歸一擲賭却如花妾惟言不顯不狂其名不彰悲夫

木落蕭蕭蟲鳴唧唧不覺朱萼臉紅霜劫髻漆世途多  
事泣向秋日方今少壯不努力老大悲傷復何益

野田黃雀行

高樹風多吹爾巢落萸深葉暖宜爾依泊莫近鴉類蛛  
網亦惡飲野田之清水食野田之黃粟深花中睡埽土  
裏浴如此即全勝啄太倉之穀而更穿人之屋

懷素上人草書歌

張顛顛後顛非顛直至懷素之顛始是顛師不談經不



坐禪筋力惟於草書妙顛狂却恐是神仙有神助兮神  
莫及鐵石畫兮墨須入金樽竹葉數斗餘半飲半傾山  
衲濕醉來把筆猛如虎粉壁素屏不問主亂拏亂抹無  
規矩羅刹石上坐伍子胥削通八字立對漢高祖勢崩  
騰兮不可止天機暗轉鋒鏑裏閃電光中霹靂飛古栢  
身中旱龍死駭人心兮目眈呼鬱切 睽香激切 頓人足兮神  
辟易乍如沙場大戰後斷檣楸箭何狼籍又似深山怪  
石上古病松枝掛鐵錫月兔筆天竈墨斜鑿黃金側判

玉珊瑚枝長大如東天馬驕獐不可勒東却西南又北  
倒還起斷復續忽如鄂公捉住單雄信秦王肩上搭著  
棗木槩懷素師若不是星辰降瑞即必是河嶽孕靈固  
宜須冷笑逸少爭得不心醉伯英天台古杉一千尺崖  
崩岸折何崢嶸或細微仙衣縫綻金線垂或妍媚桃花  
半紅公子醉我恐山為墨兮海為水天為筆兮書大地乃  
能略展狂僧意長恨與師不相識一見此書空歎息伊昔  
張謂任華葉季良數子贈歌豈虛飾所不足者渾未嘗

道著其神力石橋被燒却良玉不土蝕錐畫沙兮印  
泥世人世人莫得測知師雄名在世間明月清風有何極  
獻錢尚父

貴逼人來不自由龍驤鳳翥勢難收滿堂花醉三千客  
一劍霜寒十四州鼓角揭天嘉氣冷風濤動地海山秋  
東南永作金天柱誰羨當時萬戶侯

春山行

重疊太古色濛濛花雨時好山行恐盡流水語相隨黑

壤生紅木黃猿領白兒因思石橋日曾與道人期

詠吟

經天緯地物動必計天才盡日覓不得有時還自來真  
風含素髮秋色入靈臺吟向霜蟾下終須神鬼哀

送人赴舉

兩河兵火後西笑見吾曹海靜三山出天空一鶴高賃  
居槐陟屋行卷雪埋袍他日如相見栽桃向海濤

老僧

獨住無人處松龕嶽色侵僧中九十臘雲外一生心白  
髮垂不剃青眸笑轉深猶能指孤月為我暫開襟

贈道士

闌茸復埃塵難親復易親皆疑有仙術問著却愁人祇  
是耽浮蟻曾云見泣麟相逢先合掌渾似有前因

苦熱

松桂晝不動陽鳥飛半天稻麻難結實砂石欲生煙毒  
氣仍干扇高枝不立蟬舊山多貯雪歸去是何年

贈隱者

千峰映碧湘，真隱此中藏。  
飯不煮石，喫眉應似雪。  
長楓根支酒甌，鶴蟲落琴牀。  
雖效忘機者，斯人尚未忘。

送僧歸天台

天台四絕寺，歸去見師真。  
莫折枸杞葉，令他拾得嗔。  
空聞聖磬瀑，細落花巾。  
必若雲巾老，他時得有隣。

新蟬

尋常看不見，花落樹多苔。  
忽向高枝發，又從何處來。  
風

金剛經疏  
卷六  
清聲更揭月苦思彌哀多少求名者年年被爾催

秋寄李頻使君

務簡趣誰陪清吟共綠苔葉和秋蟻落僧帶野風來留  
客朝嘗酒憂民夜畫灰終期冒風雪江上見宗雷

題簡禪師院

機忘室亦空靜與沃洲同惟有半庭竹能生竟日風思  
山海月上出定印香終繼後傳衣者還須立雪中

懷智體上人

把筆懷吾友庭鶯百轉時惟應一處住方得不相思雪  
水淹門閫春雷折樹枝平生無限事不獨白雲知

憶在山中時

憶在山中時丹桂花歲蕤紅泉浸瑤草日夕生華滋  
簌屋開地爐翠牆挂藤衣看經竹牕邊白猿三四枝東峰  
有老人眼碧頭骨竒種薤煮白石旨趣如嬰兒月上來  
打門月落方始歸授我微妙訣恬然無所為別來六七  
年只恐白日飛



春晚書山家主人壁

柴門寂寂黍飯馨  
山家煙火春雨晴  
庭花濛濛水泠泠  
小兒啼索樹上鶯

深山逢老僧

衲衣線麤心似月  
自把短鋤鋤楮青  
石溪邊踏葉行  
數片雲隨兩眉雪

邊上作二首

山無綠兮水無清  
風既毒兮沙亦腥  
胡兒走馬疾飛鳥

聯翩射落雲中聲

其二

陣雲忽向沙中起探得胡兵過遼水堪嗟護塞征戍兒  
未戰已疑身是鬼

宿深村

行行一宿深村裏雞犬豐年鬧如市黃昏見客合家喜  
月下取魚戽塘水

書石壁禪居

赤旗檀塔六七級白菡萏花三四枝禪客相逢勸歸去  
此心能有幾人知

聽僧彈琴

家近吳王古戰城海風終日打檣聲今朝鄉思渾堆積  
琴上聞師大蟹行

再遊東林寺三首

臺殿參差聳瑞煙桂花飄雪水潺潺莫疑遠去無消息  
七萬餘年始半年

其二

宣玄舊輦殘雲濕耶舍孤墳落照遲有箇山僧倚松睡  
恐人來取白猿兒

其三

玉像珠龕香陣橫錦霞多旁石墻生辟蛇行者今何在  
花裏惟聞鳩鳥聲

題蘭江言上人院二首

一生只著一麻衣道業還期習彥威手把新詩說山夢

石橋天柱雪霏霏

其二

只是危吟坐翠層  
門前岐路自崩騰  
青雲名士時相訪  
茶煮西峯瀑布冰

風琴

至境心為造化功  
一枝青竹四絃風  
寥寥雙耳更深後  
如在緱山明明中

繡州張相公見訪

德符唐德瑞通天曾叱讒諛玉座前千襲綵衣宮錦薄  
數牀御札主恩偏出師暫放蕭何筭得罪惟撐范蠡船  
未報君恩終必報不妨金地禮青蓮

秋夜曲

蟪蛄切切風騷騷芙蓉噴香蟾蜍高孤燈耿耿征婦勞  
更深撲落金錯刀

湘江懷古

煙浪漾秋色高吟孰得隣一輪湘渚月萬古獨醒人岸

濕穿花遠雲香禱廟頻祗應諛佞者到此不傷神

寒思廬山賈生

山兄詩僻甚寒夜更何為覓句惟頑坐嚴霜打不知石  
膏粘木屐崖栗落冰池近見禪僧說生涯勝往時

雪夜寄友人

皓彩中宵合開門失所蹤何年今夜意共子在孤峰氣  
射燈花落光侵壁罅濃惟君心似我吟到五更鐘

途中逢周朴

東西南北路相遇共興衰世獨無知己子從何處來菊  
衰芳草在程遠宿煙開儻遇中興主還應不用媒

休糧僧

不食更何求自由中自由身輕嫌衲重天旱為民愁應  
器誰將去生臺蟻不遊會須傳此術相共老林丘

題擇詞律師院

律中鱗角者高淡出塵埃芳草不曾觸幾生如此來壑  
風吹磬斷杉露滴花開如結林中社伊子願一陪



山居十首

休話喧譁事事難  
山翁只合住深山  
數聲清磬是非外  
一箇閒人天地間  
綠圃空階雲冉冉  
異禽佳草水潺潺  
無人為向羣儒道  
巖桂枝高更好攀

其二

誰是言休即便休  
高吟靜坐碧峰頭  
三間茅屋無人到  
十里松關獨自游  
明月清風宗炳社  
夕陽秋色庾公樓  
修心未到無心地  
萬種千般逐水流

其三

露滴紅蘭玉繞畦間拖象屐到峯西但令心似蓮花潔  
何必身將槁木齊古塹細煙紅樹老半巖殘雪白猿啼  
雖然不是桃源洞春至桃花亦滿溪

其四

嵐嫩風輕似碧紗雲樓金像隔煙霞葛苞玉粉生香瓏  
菌簇銀釘滿淨槎舉世只知嗟逝水無人微解悟空花  
可憐擾擾塵埃裏雙髻如絲事似麻

其五

心心不住希夷石室巉巖白髮垂惜竹不除當路笋  
愛松留得礙人枝焚香開卷霞生砌捲箔冥心月在池  
無限故人頭已白不知今日復何之

其六

一庵瞑目在穹冥茵枕松牀蘚陣青乳鹿暗行樵徑雪  
瀑泉微濺石樓經間吟不覺過天井長嘯還能動嶽靈  
應恐無人知此意非凡非聖獨醒醒

其七

五嶽煙霞連不斷三山洞穴去應通  
石牕歌枕疎疎雨水碓無人浩浩風  
童子念經深竹裏獼猴拾蠅夕陽中  
因嗟往事拋心力六七年來楚水東

其八

翠竇煙巖畫不成桂華瀑沫雜芳馨  
撥霞掃雪和雲母掘石移松得茯苓  
好鳥傍花窺玉磬嫩苔如水沒金瓶  
從他人笑從他笑地覆天翻也只寧

其九

自古浮華能幾幾  
逝波終日去滔滔  
漢王廢苑生秋草  
吳王荒宮入夜濤  
滿屋黃金機不息  
一頭白髮氣猶高  
豈知物外金仙子  
甘露天香滴毳袍

其十

自休自了自安排  
常願居山事偶諧  
僧採樹衣臨絕壑  
狄爭山果落空階  
閒擔茶器緣青嶂  
靜衲禪袍坐綠崖  
虛作新詩反招隱  
出來多與此心乖

春野作

閒步淺青平綠流水征車自速誰家挾彈少年擬打紅  
衣啄木

寒江上望

荒岸燒未死白雲凝不動極目無人行浪打取魚籠  
月夕

霜月夜徘徊樓中羌笛催曉風吹不盡江上落殘梅

唐僧弘秀集卷六